

Newspaper	UTUSAN MALAYSIA
Date	05 MARCH 2017

# Lebih baik tumpu kegiatan agama

UM-5/3/2017

**KUALA LUMPUR 4 Mac** - Bekas Perdana Menteri, Tun Dr. Mahathir Mohamad dinasihatkan segera berhenti berpolitik dalam usianya yang hampir mencecah 92 tahun untuk memberi lebih tumpuan kepada ibadat.

Perkara tersebut ditegaskan dua tokoh agama terhadap sikap Dr. Mahathir yang masih berpolitik meskipun bekas Perdana Menteri itu sudah semakin berusia.

Mufti Pahang, **Datuk Seri Dr. Abdul Rahman Osman** mengingatkan Dr. Mahathir agar lebih menumpukan kepada kegiatan keagamaan yang boleh membawa kebaikan kepada diri beliau dan umat Islam.

Tegasnya, pada usia Dr. Mahathir ketika ini, beliau seharusnya bergiat dalam pertubuhan-pertubuhan dakwah dan bukannya dalam parti politik yang boleh membawa kepada



**ABDUL RAHMAN**



**MAHFODZ MOHAMED**

perpecahan umat Islam.

“Beliau perlu bergiat aktif dalam berdakwah untuk agama kerana dengan cara itu umat Islam akan lebih menghormati beliau sebagai seorang negarawan,” katanya ketika dihubungi hari ini.

Beliau berkata demikian ketika diminta mengulas tentang pelbagai kenyataan politik bekas

Perdana Menteri itu yang dilihat boleh menjejaskan kesatuan umat Islam di negara ini.

Sementara itu, Ketua Dewan Ulama Pas, **Datuk Dr. Mahfodz Mohamed** berkata, pada usia yang telah melebihi 90 tahun, sudah sampai masanya Dr. Mahathir memberi tumpuan lebih kepada agama berbanding isu politik.

“Dr. Mahathir telah menjadi Perdana Menteri selama 22 tahun, semua, dia dan anaknya sudah kecapi.

“Jadi, tidak sepatutnya beliau mencampuri urusan politik negara lagi, lebih baik beliau berubah beri tumpuan kepada keagamaan, pergi masjid atau surau lebih baik,” katanya.